

ORIGEN DI WEG KUSTBATTERIJ

Tirando un bista riba e portret aki, tabata tin discusion di unda e ta situa, kico e ta, te cu colega Juby Naar a laga sa cu esey ta origen di Weg Kustbatterij. Ora cu a puntra di con esey ta, el a conta un historia interesante cu nos ta publica awe.

"Loke por mira aki ta pedestal di un di e 3 cañonnan cu tabata tin patras di Juana Morto, unda awe tin un tereno di bala riba Diamantbergweg na San Nicolas.


"E construccion aki tabata masha masivo cu e cañonnan gigante di diferente tamaño cu

tabata tin riba nan."

"Si wak bon riba e portret unda tin algo skirbi, por nota un pleki preto prome cu e grafiti. Esey ta parti di un porta di hero. E gleuf cu por mira den e parti patras di e construccion tabata mas bien un lugar di vigilancia."

"Riba e construccion tabata tin e cañonnan. Nan tabata draai manualmente di manera cu por a bira nan pa Costa, pa Fontein, pa Lago bay abao, y tambe direccion di Playa".

Nan ta baterianan di costa, yama na hulandes Kustbatterij. E caminda di e kazerne cu



tabata situa mas o menos 400 meter mas pabao, pa e baterianan aki tabata ser yama "caminda pa e baterianan di costa, y na hulandes Weg naar de Kustbatterij y for di esaki a bini e nomber pa e caminda den añanan 40 y 50 Weg Kustbatterij".

Juby a relata con como mucha, den grupo nan tabata sali di Lago Heights, topa nan amigitonan di Juana Morto, y hunto nan tabata bay "hunga guerra" aki.

"Tabata prohibi di parti di Marinierskazerne y di parti di polis di Lago, pa hunga na e lugar aki, pero di teeuw caba nos por a mira autoridadnan ta bini, sin cu nan ta mira nos, di manera cu nos tabata tin amplio tempo pa sconde."

"Tabata tin un coredor entre e diferente edificacionnan aki, separa cu porta di hero diki. Nos tabata pasa di un pa otro bao di e bunkernan sin cu nos tabata ser haya".

"Cada construccion cu su bunker tabata tin un cañon cu ta di mas o menos 5 meter largo y cu boca di mas o menos 30 pa 40 cm di diameter. No puntrami con ta yama e parti dilanti cu por ta un barril, ni tipo di cañon, pasobra esey nunca a interesami te awor cu mi ta papia di dje. Mi por djies splica na mi manera kico tabata tin.

Nos a yega di haya mortero, loke nos tabata yama "bom" di diferente tamaño, y pa esey tabata yama polis y marinierskazerne pa bin busca. Tabata tin mucha cu granada na cas como pronkstuk. Loke si nos a haya masha hopi tabata balanan di e riflennan cu tabata ser usa e tempo ey. Cada municion cu haya ya ta trece temor cerca bo y bo ta keda leeuw y percura pa polis y marinierman bini eynan."

"Loke si tabata ponebo rabia ta cu bo ta pone autoridadnan na altura di tur cos, y riba dje bo ta haya un skwal cu ni na cas bo no ta haya di bo mayoran, y nan ta core cubo di eynan".

"Ta di lamenta cu a basha tur cos abao y desmantela e cañonnan. Awor a keda solamente ruina como recuerdo. E bunkernan na Costa a desaparece, e bunker na Lago

Heights a desaparece, e post di tiro traha di hero masivo na Costa, a desaparece. No tin nada mas..., jammer, jammer, jammer".

TIN UN BANDERA

Tin un bandera - hoben, den mundo ta bula Di un pais nobo, chikito, pero stima y respeta Tin un bandera....cu ta mara na mi curazon. Mi bida mes, pa salba su honor, mi ta ofrece Tin un bandera....cu semper bay mi kier weite

Ta bula limpi, sin nada pa manche Tin un bandera....cu ta yena mi wowo cu lagrima

Hora leu for di mi tera, mi ta mire ta saluda Tin un bandera....cu pa mi ultimo deseo lo mi pidi,

Si acaso, den otro pais, mi bida a termina Trece mi curpa sin bida, na mi isla stima

Y cu mi bandera, lo mi kier ta tapa Aunke morto y sin voz, mi curazon den silencio lo ripiti:

"Tin un bandera....Aruba....esey.....ta bo bandera!! E BANDERA, cu ETERNAMENTE LO MI SA DI STIMA

Anna Krozendijk-de Cuba

Dedica na mi isla natal Aruba, celebrando dia 18 di Maart NOS HIMNO Y BANDERA

"ARUBA"

Aruba, ki bunita bo ta rondona pa laman blauw y cla y bo santo blanco refina esey ta mi isla cu mi ta stima

Aruba, manera un mucha consenti as' na bo a mira bo pueblo sobrevivi awe bo nomber cu orgullo ta nombra den tur skina y ta hopi admira

Aruba, e paraíso bendiciona pa Señor dunando nos e privilegio cu tur honor pesey cu forsa nos himno ta worde canta engrandeciendo nos pida baranca Aruba

Skirbi pa:

Omaira I. Rodriguez-Britten

1976

Pabien Pueblo di Aruba! Cu awe nos ta celebra nos 20 aña di nos Himno, Bandera y Escudo y 2do lustro di nos Status Aparte.

1996

Viking Freight

CAR COLOUR ARUBA

Pabien Pueblo di Aruba

cu nos 20 aña di nos Himno y Bandera y 10 Aña di Status Aparte